

Sarajevo, 06.05.2022. godine

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE BOSNE I HERCEGOVINE
PREDSTAVNIČKI DOM
n/r Mirsad Zaimović, predsjedavajući

Bosna i Hercegovina
Federacija Bosne i Hercegovine
**PARLAMENT FEDERACIJE
SARAJEVO**

Primljeno: 06-05-2022			
Org. jed.	Broj	Priloga	Vrijednost
01	-02-	930	/22

U skladu sa članom 179., a u vezi sa članovima 163. i 165. Poslovnika Predstavničkog doma Parlamenta Federacije Bosne i Hercegovine, podnosimo u parlamentarnu proceduru "**Nacrt Zakona o podršci Srebrenici**".

Nacrt Zakona dostavljamo u prilogu ovog akta.

Predsjednik Kluba zastupnika SDP BiH

Damir Mašić s.r.



NACRT ZAKONA O PODRŠCI SREBRENICI

**Predlagač: Klub zastupnika Socijaldemokratske partije Bosne i Hercegovine u
Zastupničkom domu
Parlamenta Federacije Bosne i Hercegovine**

1. OPĆE ODREDBE

Član 1.

Ovim se Zakonom određuju poticajne mjere za ubrzanu obnovu i razvoj Općine Srebrenica, podrška povratnicima u Srebrenicu i žrtvama genocida počinjenog u Srebrenici, te članovima njihovih porodica.

Obnova i razvoj Općine Srebrenica od posebnog je interesa za Federaciju Bosne i Hercegovine (u daljem tekstu: Federacija).

Područje na kojem će se primjenjivati mjere određene ovim Zakonom je područje Općine Srebrenica.

Član 2.

Prava određena ovim zakonom odnose se na stanovnike Općine Srebrenica sa prijavljenim trajnim mjestom prebivališta u ovoj Općini najmanje šest mjeseci prije dana ostvarenja prava predviđenog ovim zakonom, a posebno na građane koji su preživjeli genocid u Srebrenici ili su članovi njihove porodice stradali u genocidu u Srebrenici.

Članovima porodice koji su stradali u genocidu u Srebrenici u smislu ovog zakona smatraju se roditelj ili staratelj, dijete, supružnik, brat ili sestra, djed ili nana i unuče lica koji ostvaruje pravo, a koji su ubijeni u genocidu u Srebrenici u periodu 1992-1995. godine, ili se službeno vode kao lica nestala u periodu počinjenja genocida u Srebrenici.

Član 3.

Poticajne mjere ubrzane obnove i razvoja Općine Srebrenica odnose se na:

1. ratom razorene ili oštećene građevine (poslovne, stambene, objekte infrastrukture, i druge objekte u posjedu ili vlasništvu povratnika na području Općine Srebrenica),
2. povratak prognanika i izbjeglica,
3. zapošljavanje i otvaranje novih radnih mjesta,
4. osiguranje zdravstvene njege za stanovnike Općine Srebrenica,
5. tehničko-tehnološku modernizaciju domaćinstava i stambeno zbrinjavanje povratnika u Općinu Srebrenica,
6. obrazovanje i radno osposobljavanje povratnika u Općinu Srebrenica,
7. razvoj poduzetništva,
8. prevenciju iseljavanja sa područja Općine Srebrenica,
9. očuvanje sjećanja i uspomene na genocid počinjen u Bosni i Hercegovini, posebno na području Općine Srebrenica,
10. zaštitu dostojanstva povratnika na područje Općine Srebrenica.

2. IZVORI SREDSTAVA ZA FINANSIRANJE MJERA

Član 4.

Izvori sredstava za finansiranje mjera iz člana 3. ovog Zakona jesu:

- sredstva iz budžeta Federacije,
- kreditna sredstva,
- donacije,
- ostali izvori, u skladu sa zakonom.

Član 5.

Donacije u smislu ovoga Zakona mogu biti u novcu, robi i uslugama.

Donacije u uslugama su: građevinske, prijevozničke, medicinske, intelektualne i druge.

Sredstva iz donacije koriste se u skladu sa Planom i Programom obnove i razvoja Srebrenice, ako donator ne odredi namjenu donacije.

Posebne poticajne mjere provode se neovisno o mjerama i aktivnostima iz Plana i Programa obnove i razvoja Srebrenice.

3. PLAN I PROGRAM OBNOVE I RAZVOJA

Član 6.

Vlada Federacije (u daljem tekstu: Vlada) na prijedlog Ministarstva zaduženog za pitanja povratnika (u daljem tekstu: ministarstvo) utvrđuje Godišnji plan i program podrške stanovništvu Općine Srebrenica (u daljem tekstu: Plan i Program). Plan i Program potvrđuje Vlada u roku od 60 dana od dana stupanja na snagu budžeta Federacije BiH.

Plan i Program iz stava 1. ovoga člana sadrži posebno:

- projekte na koje će se primjenjivati mjere iz člana 3. ovoga Zakona.
- nositelje projekata,
- način finansiranja,
- dinamiku i rokove provedbe projekata.

Ovisno o sadržaju projekta mogu se odrediti i druge vrste nadzora kao i drugi sadržaji značajni za određeni projekt.

Član 7.

Za potrebe pripreme, izrade i provedbe Plana i Programa, te drugih aktivnosti predviđenih ovim Zakonom, uspostavlja se Ured za podršku Srebrenici (u daljem tekstu: Ured) sa sjedištem na području Općine Srebrenica.

Ured ima svog rukovodioca i stručne uposlenike na području Općine Srebrenica.

Prednost pri uposlenju u Uredu imaju lica koja ispunjavaju uvjete iz člana 2. ovog Zakona.

Ured za svoj rad odgovara osnivaču kojem podnosi godišnje izvještaje o svom radu, te na zahtjev osnivača i periodične izvještaje.

Ured se uspostavlja najkasnije za šest mjeseci od dana stupanja na snagu ovog Zakona pri Federalnom ministarstvu raseljenih osoba i izbjeglica.

4. NAČIN RASPOLAGANJA FINANSIJSKIM SREDSTVIMA

Član 8.

Sredstva za finansiranje mjera iz člana 3. ovog Zakona uplaćuju se u korist posebnog žiro-računa za podršku povratnicima u Općini Srebrenica.

Član 9.

Ministarstvo finansija Federacije BiH, propisat će način i tehniku uplaćivanja sredstava za obnovu i razvoj predviđenih ovim Zakonom.

Propis iz stava 1. ovoga člana donosi se u roku od 60 dana od dana stupanja na snagu ovoga Zakona.

Godišnji iznos sredstava za realizaciju mjera iz Plana i Programa u budžetu Federacije ne može biti niži od 2.000.000,00 KM (dva miliona konvertibilnih maraka).

Najmanje 10% od iznosa iz prethodnog stava bit će godišnje uplaćen Memorijalnom centru Srebrenica u svrhu osiguranja kontinuiteta rada i održavanja Memorijalnog centra Srebrenica.

Član 10.

Sredstvima iz člana 9. ovog Zakona raspolaže Ministarstvo prema utvrđenom Planu i Programu.

5. POSEBNE POTICAJNE MJERE

Član 11.

Sva lica sa prijavljenim mjestom prebivališta na području Općine Srebrenica koja ispunjavaju uslove iz člana 2. ovoga Zakona, imaju pravo na besplatnu zdravstvenu njegu u svim zdravstvenim ustanovama čiji je osnivač Federacija BiH.

Posebne mjere i kriterije o načinu ostvarenja prava iz ovog člana propisuje Federalno ministarstvo zdravstva u roku od 60 dana od dana stupanja na snagu ovog zakona.

Član 12.

Poslodavci sa sjedištem ili poslovnom jedinicom na području Općine Srebrenica, kada obavljaju poslovnu djelatnost, imaju pravo na novčanu nadoknadu za uposlene osobe sa prijavljenim mjestom prebivališta u Općini Srebrenica iz člana 2. ovog Zakona, te za građane koji su prethodno imali prijavljeno mjesto prebivališta na području Federacije BiH, a koji promijene mjesto prebivališta i isto prijave na području Općine Srebrenica, po osnovi:

- plaćenog doprinosa za penzijsko i invalidsko osiguranje;
- plaćenog doprinosa za zdravstveno osiguranje;
- plaćenog doprinosa za osiguranje od nezaposlenosti;
- poreza na dohodak.

Za lica iz prethodnog stava Federacija će poslodavcima sa sjedištem na području Općine Srebrenica ili poslovnom jedinicom na području općine Srebrenica refundirati iznos u visini od 50% od uplaćenih doprinosa i poreza po iznad navedenim osnovama.

Poseban propis o načinu ostvarenja prava iz ovog člana propisuje Ministarstvo finansija Federacije BiH u roku od 60 dana od dana stupanja na snagu ovog zakona.

Član 13.

Lica koja obavljaju samostalnu djelatnost kao jedino i glavno zanimanje, odnosno samostalni obrtnici i poljoprivrednici koji imaju registrovanu djelatnost na području Općine Srebrenica, a koji zadovoljavaju uslove iz člana 2. ovog zakona, imaju pravo na tromjesečnu ili godišnju refundaciju troškova komunalnih usluga, telefonskih usluga i troškova električne energije u visini od 50% od ukupnog iznosa navedenog troška.

Mjesečna visina refundacije iz prethodnog stava ne može biti viša od 15% od prosječne isplaćene neto plate na području Federacije BiH po podacima Federalnog zavoda za statistiku za posljednja tri mjeseca.

Lica iz stava 1. ovog člana imaju pravo refundaciju neto plate u iznosu od 40% od prosječne isplaćene neto plate na području Federacije BiH po podacima Federalnog zavoda za statistiku za posljednja tri mjeseca.

Pravo iz prethodnog stava se ostvaruje u tekućem mjesecu za prethodni mjesec ili za prethodna tri mjeseca.

Posebne mjere i kriterije o načinu ostvarenja prava iz ovog člana propisuje Ministarstvo raseljenih osoba i izbjeglica Federacije BiH u roku od 60 dana od dana stupanja na snagu ovog zakona.

Član 14.

Licima određenih struka i zanimanja za čijim radom postoji posebna potreba na području Općine Srebrenica, Federacija će snositi troškove sufinansiranja neto plate u iznosu od 20% od prosječne isplaćene neto plate na području Federacije BiH po podacima Federalnog zavoda za statistiku za posljednja tri mjeseca.

Posebne mjere i kriterije o načinu ostvarenja prava iz ovog člana propisuje Ministarstvo finansija Federacije BiH, u roku od 60 dana od dana stupanja na snagu ovog zakona.

Član 15.

Sva lica sa prijavljenim mjestom prebivališta na području Općine Srebrenica koja ispunjavaju uslove iz člana 2. ovoga Zakona, imaju pravo na besplatnu pravnu pomoć u pravnim stvarima koje se tiču ostvarenja prava pred domaćim i međunarodnim sudovima po osnovu činjenice da su preživjeli genocid u Srebrenici ili su članovi njihove porodice stradali u genocidu u Srebrenici.

Pravo iz prethodnog stava ostvaruje se putem Ureda.

Posebne mjere i kriterije o načinu ostvarenja prava iz ovog člana propisuje Ministarstvo pravde Federacije BiH, u roku od 60 dana od dana stupanja na snagu ovog zakona.

Član 16.

Vlada Federacija će izdvojiti posebna sredstva za dokumentiranje i istraživanje genocida u Bosni i Hercegovini i njegovih posljedica, sa posebnom pažnjom na genocid počinjen na području Općine Srebrenica.

Član 17.

Roditelji ili staratelji sa mjestom prebivališta u Općini Srebrenica koji imaju troje ili više maloljetne djece, imaju pravo na mjesečnu naknadu po djetetu u iznosu od 15% od visine prosječne neto plate u Federaciji Bosne i Hercegovine za posljednja tri mjeseca, prema podacima Federalnog zavoda za statistiku.

Uslov za ostvarenje prava iz prethodnog stava je da najmanje jedan roditelj/staratelj ispunjava uvjet iz člana 2. ovog zakona.

Pravo iz stava 1. ovoga člana ostvaruju i roditelji ili staratelji sa područja Federacije koji promijene mjesto prebivališta i isto prijave na području Općine Srebrenica. Kako bi ostvarili pravo iz navedenog stava, roditelji ili staratelji moraju imati prijavljeno mjesto prebivališta na području Općine Srebrenica najmanje šest mjeseci prije ostvarenja navedenog prava, te su se isti dužni pisanim putem obavezati da mjesto prebivališta neće promijeniti najmanje pet godina od dana ostvarenja prava.

Pravo na naknadu iz stava (1) ovog člana ostvaruje se na period ne duži od pet godine po djetetu, ili do prestanka ostvarenja uslova iz navedenog stava.

Pravo na naknadu iz stava (1) ovog člana prestaje i promjenom prebivališta jednog ili oba roditelja/staratelja izvan područja Općine Srebrenica.

Član 18.

Porodilja sa prijavljenim mjestom prebivališta na području Općine Srebrenica ima pravo na jednokratnu porodiljnu naknadu u visini od najmanje dvije prosječne neto plate u Federaciji Bosne i Hercegovine, koja se izračunava prema podacima Federalnog statističkog zavoda za posljednja tri mjeseca, ukoliko ona ili njen supružnik ispunjavaju uslove iz člana 2. ovoga zakona i ukoliko majka ima prijavljeno prebivalište u Srebrenici najmanje godinu dana prije rođenja djeteta.

Zahtjev za ostvarenjem prava iz prethodnog stava porodilja nadležnom organu podnosi u roku ne duljem od 6 mjeseci od dana rođenja djeteta.

Posebne mjere i kriterije o načinu ostvarenja prava iz ovog člana propisuje Federalno ministarstvo finansija u roku od 60 dana od dana stupanja na snagu ovog zakona.

7. NADZOR

Član 19.

Nadzor nad primjenom ovoga Zakona obavljat će Vlada Federacije putem nadležnih ministarstava i inspeksijskih organa.

Nadzor nad provedbom projekata u utvrđenim rokovima obavljat će Federalno ministarstvo raseljenih osoba i izbjeglica, a nadzor nad korištenjem sredstava obavljat će Federalno ministarstvo finansija.

8. KAZNE NE ODREDBE

Član 20.

Novčanom kaznom u iznosu od 500,00 KM do 3.000,00 KM kaznit će se za prekršaj odgovorno lice u nadležnom organu uprave i službenik organa uprave ako:

1. prizna ili oduzme status građanima u Srebrenici iz člana 2. suprotno uvjetima ovog zakona;
2. učini ili propusti radnju zbog koje su povrijeđena neka od ostalih prava lica kojim pripadaju prava propisana odredbama ovog zakona;
3. daje netačne podatke ili lažne izjave ili ako preusmjeri pomoć u nenamijenjene svrhe iz ovog zakona.

Član 21.

Novčanom kaznom u iznosu od 1.000,00 KM do 3.000,00 KM kaznit će se za prekršaj fizičko lice ako:

1. dostavi netačne podatke ili poduzme druge aktivnosti kako bi odgovorni organ doveo u zabludu sa ciljem ostvarenja nepripadajuće koristi po odredbama iz ovog zakona;

2. daje netačne podatke ili lažne izjave ili ako preusmjeri sredstva u nenamijenjene svrhe iz ovog zakona.

9. STUPANJE NA SNAGU

Član 22.

Ovaj Zakon stupa na snagu osmog dana od dana objavljivanja u "Službenim novinama Federacije Bosne i Hercegovine".